

四庫全書

集部

欽定四庫全書

集部

圭齋文集卷

十至
十二

詳校官中書

臣 呂光復

侍讀臣孫球覆勘

總校官進士 臣 繆 琪

校對官中書 臣 范 鏊

謄錄監生 臣 徐秉文

欽定四庫全書

圭齋文集卷十

元 歐陽玄 撰

墓碑銘

元故中奉大夫江南諸道行御史臺侍御史劉

公墓碑銘

至元元年冬十月江南行臺侍御史鰲公未引年拜疏
致事歸長沙二年夏四月丁酉薨于私第是年冬十二
月以治命葬湘西嶽麓山之原湖南憲使汝南梁公遺

既志其藏諸孤奉行實來瀏以墓表屬於契家廬陵歐陽玄請文志諸石按公諱宗說字傳之世成都華陽人大父宋末嘗為茶陽軍使因家鄰境之攸與幼侍祖父遠宦嶺外既孤適遭宋亡克自樹立從鄉先生趙公朴學于宜春年十二三能屬文有才諳踰弱冠以薦補廣西憲史再辟湖南貢南臺察院史歲滿調衡州錄事判官中書刑部辟職官史皆未赴臺除廣西憲司照磨選充南臺掾改湖東憲司照磨仍畱掾南臺擢海北憲司

經歷遷河南憲司經歷拜南臺監察御史轉河南江浙
兩行省員外郎江浙未赴改南臺都事入爲中書右司
都事拜內臺監察御史將進臺都事力辭出爲山南浙
西兩道肅政廉訪副使復被選爲臺都事俄出爲淮東
道肅政廉訪使陞廣西道肅政廉訪使移江東道肅政
廉訪使召拜刑部尚書尋歸休於家起爲江南諸道行
御史臺治書侍御史陞侍御史積階中奉大夫公敷歷
臺省諏咨四方出處偉節規撫古人初掾桂臬訪故父

旅殯行諸蒼梧即投檄辭歸以申情事孝節著聞見器
諸老厥後宦業寢盛受知文皇主畫中臺上所親擢侍
燕內廷鬚髮盡白或謂公老上曰傳之在南臺已然此
正老成可用之日也公被眷遇知無不言進退有度縉
紳則之移疾告歸上弗能強廣右之命公去留之疾愈
治行益用見信及以秋官召還文皇賓天遭時多艱大
獄屢起語連宗親公公正不撓刑無濫施事定勇退論
公生平忠孝大畧於此槩見所至蒞政詳明用法矜恕

挺囚藤梧寇黃京夫脅愚民為亂有司坐首從皆死公
誅渠魁四人餘四十二人免家屬論徙遼陽肇州公謂
驅炎墟之民居洹寒地名為減死實寘死地請留嶺南
屯田全者六百餘口讞獄閩浙言海寇初皆王民身陷
惡地無由自新宜許以貫罪復業後用其言盜皆為農
河決大梁城門不開公按視得高陵撤相國寺朝元宮
木為橋百餘丈道民循城顛行薪米不絕比屋乃炊河
決小黃村陳顓千里皆沒公督有司盡力犍閉河復故

道流離日還淮東大饑勸分維揚一日得楮幣十五萬
八千八百餘緡所賑以戶會三十一萬三百有奇以口
計一百一十四萬一千八十故公政聲發軔海嶠振于
河淮由平反恤災之功居多至於吏能則在中書右司
兩月掾屬心服其竄正吏牘運筆如飛造次之間辭理
俱暢在刑曹半年滯事悉決乃定遇革刑制七十六款
頒示天下無復質疑公處寮案退然一儒未嘗少有衒
襮獨善善惡惡無所避覲在河南時薦前憲使韓從益

行省郎中納琳等二十七人為刑臺御史薦浙西憲使
許敬思戶部尚書喀爾回河南行省員外郎胡彞等五
十五人乞召還敢諫御史李謙亨成珪於竄所乞叙用
故臺臣益陵真中丞苗侍御等八人於家劾前中書左
丞黨附權臣暴斂為虐劾河南行省叅政往括田江西
橫斂府縣激變為廣右掌政能制僉憲不敢為苛為南
臺幙賓力斥中丞繩下之酷為荆憲黜賍吏三百九十
八員汴蒙古都萬戶畜巨獒納豕肝肺芻人腹中習獒

啞人軍士忤已輒噬殺之公正其罪江陵豪僧謀人获
園誣以殺三僧焚之置三豕心燼中為驗公辨其詐抵
僧罪釋無辜二十一人湖廣辨章征徭恒怯公奏罷之
古縣戍將據校宮毀宣聖像公定罰錮之海南其劾閩
憲聲跡兩使者望風解印嘗不就江西行省辟掾時相
為之慚色自居下僚比至要塗論事英發往往洞識治
體至大中陳革弊防姦戢貪除暴等十事又言六品以
下封妻不及父母非人子志後封贈倏罷又力請復之

延祐中請置東宮宏文館選端人為宮教博士講六經以輔儲德又請除迤戶糧置迤北沿河倉儲節臺中罰布之用以助賑濟權古今錢幣之制以便小民至順中言盜駢馬牛羊罪當為等差百官名在罪籍不宜普該恩澤或至再叙侍文皇清燕密上封事其目曰明人倫序宗族命賢相慎殺戮義取仁守保全功臣貶酒闕色親忠遠佞儒臣進讀宜講帝王之道勿事浮靡罪人妻孥分賜臣下宜別宗親以存上下之分皆稱上旨凡所

建明咸以著為令或遇布政輒在議中其惠利久遠若
築堤海康闢田萬頃以徠海外耕民海北民鬻食鹽又
輸鹽丁錢公奏弛其征文皇居潛瓊筦以是知公疾革
猶索紙筆作遺表欲有所陳未成而薨年六十有九曾
祖鑑宋宣教郎祖景高宋韶州通判贈嘉議大夫禮部
尚書上輕車都尉追封彭城郡侯父重坤贈中奉大夫
四川等處行中書省叅知政事護軍追封彭城郡公娶
毛氏繼娶王氏皆先公卒並追封彭城郡夫人再娶張

氏三子長孝友承事郎岳州路經歷公未寢疾奉命展
省先塋聞計得疾後公六十一日卒次孝敬登仕郎永
州路知事辟湖廣省掾史次孝恭廣西道宣尉司照磨
女五長適江西鄉貢進士張仁偉次適伯顏次適卜德
生次適孟坤珍次適歐陽忠皆士族孫男四好禮好義
好信苟兒孫女三觀音奴觀奴永安奴公博學強記淹
貫經史以禮部公號雪界因號雪峰以志蜀土有奏議
詩文若干卷傳于世早從涿郡盧公處道學詩擅名古

體廬公憲湖南嘗語人曰錡掾傳之天資高邁他日綱維風憲必斯人也及公為臺端衆咸以為知人玄先君子內翰公於錡公契友玄辱知尤深在冑監時嘗遣子孝恭受業館下誼不得辭乃叙而銘之辭曰溫溫劉公如玉不瑕臨事決義蹇蹇法家以儒發身以學施政措為治才著為辭令惓惓告君懇懇許國粵有風紀我扶我植自厥筮仕奮由丞掾迄其懸車終始司憲入也獻替出也咨詢官之準人邦之蓋臣文皇知公字而不名

雖閔勞勩實仗老成上飲公醇公疾弗勝有殺有核賜
以豆登丹頰白鬚拜起給扶尚竭心智載陳謀謨秋官
予環遷出綴衣有執國柄赫赫作威公職司平獨立無
悚止辟不淫展也仁勇卜居長沙謝事建鄴輕舟來歸
賦詠盈篋胡不百年為國著龜明裡召從疑事就諮蒲
輪未臻榆沈斯作葵以公輶率履無忤子孫詵詵世被
德馨節患有典貶此貞銘

元贈從仕郎吉安路吉水州判官周君潛心墓

碑銘

安成周君潛心卒之五十九年以子貴有卹典於朝將錄其副以告墓次其孫絢奉其宗人南瑞所狀行來京師謁銘於予維周氏姬姓厯秦涉漢初至三國兩晉多名臣載史傳唐季有諱璟亦有聞當時其四世孫威避難遷金陵威子矩仕南唐至御史壻楊竦為吉州刺史矩至吉因家焉二子長翰次羨羨登宋建隆間第積官光祿大夫卒贈僕射又遷屬邑之西昌其族蕃衍科第

相望部使者號其里曰爵譽美子廷訓仕至供奉廷訓
子昭為江陵令卒贈殿中丞有五子次子大理評事中
師生虔化少府壽之壽之子倩遷安成之後林里又四
世為潭州通判士貴士貴子人望人望子繼祖是為周
君之父君諱晞顏初字景顏後字潛心自童丱器如成
人年十有六喪父內保家訓外親良師友奮自樹立稍
長脫去拘攣識趣軒朗舉措不擾才力恢恢至元丙子
江南初內附官府易置世務方殷故宋吏胥挾文為姦

里無賴又為囊橐善良重足而立君以孤遺出應門戶
機警辨惠果決有謀既足自彊又能為姻族鄉井捍禦
外侮衆皆倚之為安兄志伊蚤世君撫其孤不翅已子
先業粗給君善經理遂致贏餘推其所有輒濟貧乏惟
浮靡虛誕之士雖數干請秋毫不可得居鄉善善惡惡
予敎不偏訴訟有未之有司而先質正於君者陳義秉
法而劈析之咸得肯綮嚚俗為息江西行省郎中杜仲
寬聞君之賢方薦君進用俄抱病歸未幾卒于家年裁

三十有三初娶王氏先三年卒再娶觀溪劉氏五年而君卒初劉氏之祖母亦蚤寡以貞節聞辛勤教子後皆擢科湖南轉運司帳管斗則劉氏諸父南康主簿政則其父也劉氏在閨門時習聞劉母懿範故能守節自誓又能以教子為先務次子遺腹所生日抱之泣行道聞而哀之君柩久在藪不葬人問之曰吾婦人安曉葬書俟吾兒長自卜其地且未亡人守此柩日夕與俱猶同返窀穸也遣子就學歲時從師之禮無闕否則質簪珥

以繼二子感激孝養備至學殖日勤今皆成立長毅用
憲司試為瑞金縣儒學教諭陞吉安路學正借注廣州
新會縣藥徑峇巡檢辟廣東元帥府令史從元帥平循
潮二州寇有功遷桂陽路總管府知事有政績湖南憲
課其最嘗平反死囚二人及去官為立生祠歷兩考進
階從仕郎贛州錄事次恒以儒推擇為臨江贛兩路掾
歲滿為上猶縣典史毅仕至七品君得贈官其配亦追
封宜人君卒以至元戊子六月十有四日葬以大德庚

子十月十有九日墓在州北清化鄉鄴城里鐫氏卒以
泰定丁卯四月十有九日年二十有七失所天六十有
六而終葬以至正辛巳十二月十有七日墓在新樂鄉
之山塘祔姑李氏阡女一人王氏出適進士彭躍龍子
務德孫男四人絃絢浩澄孫女三人曾孫七人君初失
父遭時孔艱及其自立涉世又淺而鄉曲之譽流芳無
窮沒世之後家有節婦門有孝子克允厥宗子宦業日
盛國家飾慎終追遠之惠方來未涯是宜有銘銘曰行

以集義僅施于鄉為善竭力得年不長數有乘除分有
豐嗇已播弗獲後人是食趙祚既訖君方弱冠家緒不
蠱君植之幹若負奇氣不為供資救難則勇恤孤則慈
視前斯振顧後斯燾年不滿德君子是悼有婦撝節志
不負君有子力學底績于文生也曠遼一命若訥贈恩
便蕃子仕方進有源斯委孰禦其沛惇史作銘以訓未
艾

元贈奉議大夫樞密院判官驍騎尉追封浦江

縣子鄭府君墓碑銘有序

大江之南淝河之東有州婺有縣浦江有旌表家鄭氏
九世同爨朝廷嘉而旌之至是又有贈典告于其家是
為樞判府君由其子深起家為右丞相太傅府長史階
正六品初贈國子監丞及深遷宣文閣鑒書博士階正
五品當進贈其親故府君有是命也府君諱銳字景敏
其先滎陽人十一世祖曰凝道遷歙凝道子自牖遷睦
之淳安自牖之孫淮遷浦江淮樂善好施宋靖康年饑

鬻田千餘畝以賑其里人號所居曰仁義里淮之孫曰
綺號冲素處士事二親盡孝父照忤時貴得罪文以重
辟綺上書郡守錢端禮乞代父坐法守為之直其父冤
母張病痺手足皆廢三十餘年凡就便液綺必抱持其
主家政歲入絲粟不私鄭氏九世不異財實自綺始綺
之元孫龍游丞德珪青田尉德璋尤篤友誼怨家以死
中璋法當逮維楊珪請于有司以身代璋行竟死逮所
珪子文嗣璋子文泰皆克紹一門薪餐食指數百如出

一身令刺史舉察以間旌表其門曰義泰二子長銳即
府君幼穎悟日記數千言長明春秋事母賈孝竭力以
供子職賈病晝夜衣冠以侍湯劑者數十日無懈容其
與兄弟處表裡始終無間言怡悅見於顏色嘗典義財
每自勗曰吾家累世義居至吾之身或墜先訓萬死不
足以贖媿乃創為式用財纖悉必附日乘月吉以似家
長署而通考之由是鈎檢有法一如官寺規可以久性
勤儉任事不憚勞有餘即好施見里之貧約必思有以

賑之暇日習詩及小楷殊有思致延祐甲寅初科以明
經貢於鄉一試不偶即舍之曰當以付吾後人生以至
元己丑之二月二十有七日卒以延祐庚申之十有二
月一日壽三十有二聞其訃者咸悼其蚤世明年辛酉
三月三月初葬義烏縣延壽山之原今改本縣靈泉鄉
娶樓氏子二人長深次淇深字浚常失所依恃二十餘
年負笈入京以文行受知前太傅右丞相被選為長史
推恩及君贈承直郎國子監丞樓氏封恭人及深遷宣

文閣受經郎再遷鑒書博士擢吏部員外郎今除僉江
南浙西道肅政廉訪司事君進樞密院判官勲驍騎尉
爵浦江縣子階奉議大夫樓氏亦累封浦江縣太君深
於予有斯文之契以福建廉使貢公師泰所為行狀求
謁銘辭不獲序而銘之銘曰昔在唐虞風俗淳美史稱
可封比屋皆是降及戰國阡陌既開史稱素封實雄於
財鄭門七世資義不竭使居唐虞在可封列家擬素封
惟義發身致有誥命受封惟貞司造孔明無善不報惟

樞判君實踐允蹈孝親友兄惇族睦鄰搏用致豐植弱
賑貧義規我守義產我掌有勾有稽有籍有帳學明麟
經一試場屋出抱遺編以授子讀子蔚有文進遇東閣
謀裨鼎軸畫主帷幄再遷宮師授業內庭秘閣監書講
筵譯經乃登要津判銓天臺惟君恤典恩寵鼎來進班
宥府錫爵蒲壁義門日崇車駟翕輶靈泉新阡遷自烏
傷太史勒銘奕葉有光

元贈應奉翰林文字從仕郎安成劉聘君墓碑

銘

國子助教鐫君文廷既陞于朝當推恩其親天官為之
擇館閣美名以居之於是贈其先君子劉公以應奉翰
林文字從仕郎應奉郎唐供奉金人避其主嫌名改今
稱國朝因之雖七品階實北門詞臣惟朝士知名者得
以是榮其親文廷將歸燎黃于阡狀其先德謁銘于余
余至順庚午校藝南宮文廷余所得士也為國子祭酒
又同在胄闈故為之叙而銘之叙曰公諱蒙正字聖功

安成漢為縣屬長沙國劉氏為長沙定王後故家焉公十四世祖曰五處士初徙城西湯村晉安復縣也處士生唐末五季有善行于其鄉涉宋三百年鍾氏科第相望皆其後人公幼有宿慧五歲屬辭八歲能舉子業號曰奇童父嘗攜之貴人家貴人命以賦援筆立成思致不凡坐客歎服一日父于役公戲母周夫人側適諸父夜課子姓以鄉校賦題燭跋未就周夫人曰諸兄方苦吟兒則戲劇何為公俄默若有所營吟頃曰兒賦就矣

索紙筆寫之周夫人命以質諸父諸父為之失色以示
諸郎曰若輩徒長大曾不愧是兒明日賦傳誦衆口鄉
前輩爭造門呼出觀之居無幾世改科廢公年方富才
器卓犖自以用不適時寢不屑為章句習會丁外艱撫
事增悼終喪辭周夫人南遊衡湘常挹挹不樂喟然歎
曰大人在菽水之養不可久違簞裘之業不可久棄幡
然歸故廬盡發先人遺書淹貫六籍馳騁百家旁及盤
盂隱與虞初裨官靡不搜抉已乃大肆力於文沛然出

其有餘沾被學者四方負笈及門如適工倕長短大小咸中矩矧它匠棄捐悉就斲削以公能誘人知方便厭飫日趨不容枕也性豪舉曠達先廬故占勝地猾鄰乘公出誘大駟暗據規為已有諸從巽悞不能制公還誓必復之駟亦難公奉歸侵疆公拚除填葺招復徙者鄰以是嚙公會歲侵鄉田不毛鄰劫於征布以計弛其肩於公人謂勢必返之不則病公曰人憊故求更憊而返之不仁里有貧不能輸者毀家以代之由是生計滋削

然終不咎隣獨自責曰居不擇鄰非智去之龍雲溪上
居焉溪上多故人士族樂公之遷遣子弟受業恐後四
方勞問縉屬公內給太夫人甘肫之需外脩諸士友綢
繆之好晚況殊適環堵蕭然戶屢常滿興至觴詠賓主
盡歡高談善譚傾倒四座酒酣取古人詩文擊節而歌
聲沮金石踈髯古貌臞如列仙睥睨世故無足芥其胸
次者一日飲傍舍暮歸沾醉就寢丙夜家人聞呻吟起
問安公曰吾舊疾痛亘心膂歲常殆今二十年復作其



不瘳乎詰朝更數醫皆卻其藥不飲七日忽宵興正冠而坐召諸子語不及他唯以不得終養太夫人為恨言訖而瞑皇慶壬子十二月二十有九日也年五十有三疾初作周夫人已臥病公卒七日周夫人亡明年正月十有一日諸孤用治命奉公柩葬于故廬之陰曾大父繼周大父先登父雲鳳皆為鄉名士娶朱氏以子貴封宜人子四人長聞即文廷登第後調臨江錄事有善政居成均事稱其稟以善教名次閑次閱次閨省以經教

授女二人長適賀氏次適張氏孫男女十三人公篤於孝兄弟應龍幼孤妹歸李氏早寡于時饑饉師旅相仍公避難崎嶇往來百里間撫孤存寡恩極周緻家雖貧所識空乏即解衣推食無靳居鄉曲有譽處豪右有道雖不好以氣岸加人而見者自失其負挾平生喜讀書過目成誦朋友乚疑隨事疏荅云出某書見某註如腹有笥然為文渾厚條達不事奇澁下筆輒數千言雄議疊出多裨益世教切中治體人稱其有大對掄魁之材

尤善知人誠偽策事成敗橫逆無故至前了不為動人驟遇之見其高世不羈之材未容輒致親附而明白坦夷雖家人細故不以欺客退而消去鄙吝終身不忘雅不喜浮屠幻妄之說聞朋友有佞佛者移書切責鄉先生若靜德王公聖與青山趙公儀可復心崔公君舉養吾劉公將孫皆折輩行友之科詔既下公讀而喜曰吾老復見場屋寧非天乎尋至物故齊齋彭公長庚祭以文曰科目方興而伏生死禮樂將用而河汾亡其見重

名士如此公號山泉先生有美贖集若干卷學者傳之
既沒時人見論事不痛快臨文不强人意輒太息曰安
得復見劉山泉先生銘曰公之學碩以多可擢魏科公
之詞雅以麗可司帝制有其學不科其擢父懷其璞子
獻其殼有其詞不制其司生背其馳死踐其資其有不
居其蓄不祛其達敷腴其償寓諸茫茫九京公莫起矣
瞽宗有舜惇史有謚

元故徵士段公禮廷墓碑銘

有元徵士段公禮廷既葬之十年其孤德輔德文介余
故人之子聶孟宣以公之行實謁余請銘其墓道之石
予始辭之孟宣請益謹乃述其行而為之銘維段氏廬
陵之龍溪人入唐以來代為顯官有積階至銀青金紫
者公諱士龍字雲亨禮廷其號也曾祖仲仁祖文郁父
子開字叔茂號真逸處士始遷長沙城中三世皆有德
之士公本真逸族子宋季段氏有登進士第卒官成都
華陽主簿諱文煥者公所生曾祖也以詞賦兩請漕貢

進士諱議孫者所生父也內附初世故多艱貢士往安
成依妻家劉氏以居前至元辛巳公生劉氏家年九歲
外祖鐫梅窓先生奇其穎悟真逸無後詢之族屬求可
為後者見公拊之曰吾行四方閱人多矣是兒能振吾
宗者請以為子貢士持不可貢士沒母劉氏辛勤自立
教公從師受學甚謹又九年真逸申前請彌切乃許以
為後時真逸以貲雄于長沙得公幹蠱甚副所願公事
真逸及母李氏盡孝遇弟士虎能友士虎字文章本從

姑之子與公同繼真逸為性剛果公每濟之以寬內篤
恩愛外極彌縫家務大小咸當其可公之助居多由是
家日益裕又加潤色焉真逸晚歲優游之趣甚適公所
生由文煥而下六喪未舉公竭力營厝悉如禮同氣四
人兄可珍弟可立揭家從徙長沙公賙之有方既而夫
婦俱亡公殯其二喪撫其諸孤使之咸有所憑藉女兄
適印岡羅氏相距六百里饋問無虛月其他賑貧卹難
施諸外人無少難色每歲發廩務平其值庚午大侵則

損直傾積以濟存活無算平生讀書一見隨了大義有
所得輒加體驗而行當道薦以文學掾力辭不就家居
命僮僕治生一經指畫即不以嬰懷惟與士大夫游樂
而忘倦蓄古書畫暇日把翫清談纒纒不絕城東作三
友亭常領客觴咏歲癸酉游南嶽登祝融夜半望海日
超然有從方外之志乙亥歸廬陵徧脩先塋之祭退而
會諸族鄰姻交歡甚是年真逸年九袞歸為真逸壽擊
鮮高會遶膝奉觴鬚髮班白座客歆羨未幾真逸病侍

病勞勤及卒哀慕過情襄事甫畢公亦感疾逾三旬未
瘳一日忽呼二子語之曰民生在勤勤則不匱汝曹勉
之越數日疾復作瀕殆有僧怪牛素所往來問之曰究
竟若何舉手畫一圈曰平生受用不離乎此子問家事
不荅啓手足示之脩然而逝後至元二年丙子五月十
有二日也三年丁丑十一月庚申葬善化縣龍坑之留
思嶺公性忠厚喜愠不見顏色訓子弟能以身教有質
問必中理得年五十有六未弱冠來繼真逸始終幾四

十載父子慈孝如一日中外無幾微間言難矣哉初娶
胡女一人適廣東寅尉副使聶公以道次子孟宣劉氏
子一人德輔李氏子一人德文皆克肖孫男女各一銘
曰人生至難為後於人其難維何尊尊親親既區別
尊有隆殺君子處之先識其大所繼所生置身其間不
爽其宜得譽匪艱吁嗟禮廷動適厥中於分則嚴於情
則通歲踰三紀恩義周浹至誠咸孚靡間靡諍墳墓我
省譜圖我脩兩宗訢合二郡綢繆廬陵長沙地壤犬牙

段氏蟬聯克昌厥家里稱善人士曰善士生有處譽沒
蕃猶芷湘江之孺卜兆允臧魂魄所之咫尺故鄉慶源
川增後人其承傳史作銘詒爾雲初

元故隱士更齋先生鐫公墓碑銘有序

公諱過字益翁更齋其自號也幼穎悟日記數千言稍
長受學里中王珏王客故相江公萬里家其弟信豐宰
達父往來公從兩王先生咸稱為畏友又嘗侍先君子
登巽齋歐陽守道之門由是須溪劉辰翁中齋鄧光薦

皆以忘年友之先君子博雅能文須溪號之曰山中小
集古尤偉公論議馳騁墳素軼出旁行敷落踴蹀虞初
裨官劉氏雖好辨者終不能傲公當世務搶攘衣冠家
子弟類巽懦不更事公器局散朗應對閒暇父兄賴之
以安至元元貞間境有山盜公承檄扞禦能申條教齊
一民義里閭帖然間歲侵輒殺直以發飢者為饘寒者
為衣殭者為棺靡不終惠家居敦叙倫紀姻戚困乏者
委曲料理卒使之有業性好客善譚歲時燕集酒酣歡

洽擊節雅歌四座為悚尤不喜異端然時有佳者亦為之豁達無忌初號一山時慕遽大夫之賢著號更齋先輩耘廬鐫應登記之諸名士有詩生平裕有才諳薄於宦情分憲觀復馬公昭舉行鄉飲酒禮公侍先君子座側馬公愛其英爽欲辟以掾屬力辭御史方厓蕭泰登於公為中表屢勸公仕輒不荅晚歲順適邛園容與翰墨嗜古圖畫市或千金為知己持去亦輒委置家藏古書甚多皆手自校讎至所著作才既敏贍率易天成旋

復散逸他日門客子弟始彙成編嘗即先廬之傍改築
新宅將以逸老扁其樓曰望雲不敢忘先人也泰定丙
寅哭其長子慟然時能命客自遣自是嬰疾革呼孫
揆寅語無他及惟誦少陵微爾人盡非之句脩然而逝
生以宋開慶己未前十一月十五日沒以元泰定丁卯
閏九月二十七日年六十九歲曾祖從龍祖有開宋廸
功郎安吉州烏程縣令父惟憲南軒書院山長皆山翁
也娶戴母族以賢婉稱子男二士元士榮士元先公一

歲卒士榮早夭女四人俱適士族男孫三揆寅揆辰揆
申皆以儒學應徵辟孤孫揆寅以至順壬申十月二十
二十奉公柩葬于里之煙竹原事竣屬其姻戚易君景
升狀公行謁余請表其藏易余校藝江右時所得進士
而余亦素知劉公學行節概凜有古風若揆寅之世家
學亦士大夫之所願友者故為銘曰民生於三父師其
二倫序有五其一友誼偉矣劉公名父之子隆師親友
抑又名士三者之懿茲知其賢矧公學行允也可傳學

以事君行施于政愍不少試斯焉有命命固有之公亦
高蹈用不於時而適於道邁進者氣騰蹕者辭庶俾來
世知公于斯新居奕奕花竹斯蒼日月幾何松栢旆旆
有濬其澤由孫及曾太史撰銘悠久之徵

元故隱士廬陵劉桂隱先生墓碑銘

廬陵劉桂隱先生卒葬之三年子應麟遺孫程來京師
請其墓銘於玄值世多故未暇請也又三年遵東海以
歸乃致前請謹撫其行狀叙而銘之先生諱詵字桂翁

號桂隱其先清江之翟斜族也翟斜之族自宋公是公
非弟兄叔姪以文學聞天下號江右三鰲先生之先世
有諱滔字禹績者由翟斜徙吉水之南嶺傳六世至彥
升彥明兩弟昆升留處南嶺明分處北坑北坑以地居
上游號上族因號南嶺下族升自鵬舉五子競爽第四
子曰憫字端臣生子少齊字思賢是為先生之高祖考
少齊生子散字德卿宋太學內舍從誠齋楊文節公游
子鈴字衡甫受知文丞相號麓隱生子仁榮字雲祥號

習靜與弟化龍長子元方同領景定甲子鄉薦明年俱
及進士第雲祥授平陽尉先生平陽第四子也生二歲
失母七歲失父九歲宋亡奮以穎悟之資自樹羈孤之
中能不墜先業又斥大之今之大夫士論先生德行道
藝必推本其先人於是平陽之聯科雖不獲究用於季
代因先生克紹咸稱其有子而鰥氏自翟斜而下益有
光焉先生之為德不為世俗之所搖攷不為風聲氣習
之所淪染卓然以重厚醇雅進與鄒魯士埒而無忤容

事諸父及諸昆弟盡恭敬友愛之道先世恒產悉推讓
之子姪及門必厚遇以禮伯氏蚤世其子古臣方幼撫
育教誨使有成立古臣卒又撫其子如古臣夏氏女沒
所生角羈未甌教育而婚嫁之如禮晚即南嶺勑始祖
祠率族子歲時祭祀以正昭穆之叙居家處鄉有古君
子風訓學者能以師道自立至其為文根柢六經屬饜
子史躡轡百家濟瀉演迤資深取宏槩矧哲匠達于宗
工液古融今自執其韜應慮不獲靡施弗宜雖未嘗露

其雋傑廉悍踔厲風發之狀韞玉在櫝氣如白虹不可掩抑四方求文經屬於門有古文若干卷諸體詩若干卷駢麗書劄若干卷摠題曰桂隱集蜀郡虞先生豫章揭先生及玄皆嘗叙之各以所見極其形容詠歎之盛然以先生之文微吾三人言有不行世者乎先生沒吉之弟子顏成子狀其行稱先生年十二三時長於宋季程文若律賦論策臨文沛然蔚有老氣宋之遺老鉅公若季公鶴田肯堂深齋三公於先生為母黨尊行一見

即以斯文之任屬之中齋鄧公須溪鰻公於先生為鄉
先正見其文尤加器異鄧公嘗延之家使範其子若彭
巽吾晏山心於先生為畏友往往推服延祐初科舉復
興先生年纔四十餘州里有司舉孝悌明經太守強勸
之駕先生好古與主司瑟竽理之必然不足深論先生
退自場屋一時名家欲其子弟規進取者必厚幣求師
事之古有善射者射牛鏃掠牛腹舍麋詣精以不中為
勝賢父兄願欲得其不中之奇他日與拘拘然求中者

角我欲中斯中耳方厓蕭公為御史以教官薦學山文
公為集賢以館職薦尚書鵬南鄭公過廬陵見之歸朝
以遺逸薦公卿推轂當時賢士推轂者可得美譽賢士
何為焉先生生以宋咸淳戊辰八月二十六日卒以大
元至正十年九月十三日年八十又三葬以是年十二
月二十五日墓在州之仁壽鄉東槎灘娶印岡羅氏有
婦德能致內助先二十年卒子男三長立敬先五年卒
仲尚文克世文學先生鍾愛之惜早世季應麟業進士

女四人適同郡李以孫夏昶彭鉷蕭泰端皆宦族孫男
七觀先天次珵瑜諒璉讓珣珵今除龍溪書院山長孫
女八曾孫男二玄於先生未獲一識而書問不絕相知
為深虞公晚歸田過從甚樂每有相見遲莫之歎虞揭
二公皆先卒玄以垂髦之齒獨得銘公銘曰宇宙氣化
消長有時斯文盛衰不繫于茲富貴倘來非悠久功名
時至亦易就惟茲二事衆可最天畀斯文曰予獨近代
四家廬陵眉山臨川南豐頤頤其間展也桂隱實宗歐

陽豐曾約蘇謹嚴歸王天愍其施不靳所重我其承之
賁若光寵在衆不隨予獨不訾不貶厥齊俾昌于詒

元故旌表高年耆德山村先生歐陽公墓碑銘
至順元年冬十有二月南郊禮成詔天下民年八十以
上無失德者有司以高年耆德旌表之袁之分宜山村
先生歐陽公是年九十以齒以德當應詔元統改元又
詔賜高年帛公年九十三縣大夫來致帛見其人物議
論之偉驚且喜曰此豈徒有年者哉二帛未足以示尊

禮也詢前詔旌表猶未徧舉方謀為之請玄適在朝登以文白當道檄有司奉行之於是旌表將至偶近公生朝子孫請即是日拜命為壽有司從之比至疾遽作竣事未幾卒後八年玄謁告南歸訪族防里至公之門旌表煥然而宰木拱矣予惟德以里名士孫復孫所狀公行請銘其墓玄忍銘乎忍不銘乎公諱涇字源清號山村先世自安福令而上詳見吾宗楚國文忠公譜令以下數世有自安福遷分宜防里者至公傳十有六代代

多文儒曾祖安世祖必恭父起宗皆教授鄉里世父龍瑞登宋咸淳七年第公資貌偉特少以力學得羸疾有授以食療法久乃甦岸性孝友執親喪至柴瘠每起必杖為親擇葬地術家言某兆吉公曰何自致之曰以公孝感當自致已而果致季弟目青溫涼饑飽謹候伺之如是數十寒暑無幾微倦色沒而哭之盡哀葬之盡禮倫誼之重里人至今以為式家居飭子孫常舉平心待物四字為訓能以身教故子孫率從由是忠厚日積致

家日肥奉養日腆而公如素之習不改平生被服前代
衣冠未嘗少易華靡子孫亦不能強之暮年身健神清
稠人廣坐與一二同輩談承平舊事移日不倦歲時會
族少長咸至多至數百指語子孫曰天倫之樂無以踰
此饗餼隆殺非所計也爾後人毋廢斯禮早年習舉子
業精敏有聲場屋與季父同登俱待補國學葉丞相守
表遇士慎許可見公之文獨稱賞求識公面屢加薦達
至宋亡科舉廢乃更沉潛性命之學手編諸經傳註彙

粹先儒格言其精義奧旨融貫演繹多所論著細書大帙充牣巾箱詩文理致自足不事彫剝舉動一出誠恪不勞矜持嘗有老僧一日同集人見其踧踖於坐詢之曾從出學公教學者無他言唯勉其用功根柢異時少自樹立即有依據後進往往佩服其言生以宋淳祐辛丑六月二十六日沒以大元後至元乙亥十一月十一日年九十有五沒之明年丙子八月某日葬于里之小礮源娶某氏先公率子男一惟德字秉彛幹蠱有譽克

大厥家公歿之歲子已稀年今將八十康勁勝常人每以公壽期之孫男二務敏務實皆業進士曾孫男一玉成孫女一適彭曾孫女二長適朱少適許皆名族玄於公為族弟先世徙瀏踪跡雖渺知遇獨深銘墓之請誼不敢辭銘曰惟公之身實備五福壽躋期頤富有弟祿弟祿雖富公恬不知曷其康寧豐約不移惟其不移可久處樂耽書味道生不飲藥好德已稀況德之積迨夫考終數近滿百太樸未斲全福有人豈獨全福有行有

文有文匪他惟性惟理以淑其徒以遺孫子有覺其闕
國旌壽駿天光所臨百世流潤爾孫爾曾赫奕其承同
宗匪吝惇史足徵

居士歐陽南谷墓碑銘

居士諱同寅字同甫號南谷袁之鈐岡防里人也世為
望族家饒貲尤多儲書居士自幼為學質實既長賦性
剛塞居家庭有孝行處鄉黨有直聲輕財而賤利貴義
而重德姻族有孤遺少任其教育長釐其嫁娶里中貧

乏者飢有其粟死有其棺殮有其域歲旱先其鄉人禱
不大雨不止鄰有災集救賞募燔夫必撲滅乃退人有
訟求正善譬析以理閭閻細民有戒心來歸輒聚而保
之五六十一年之間未嘗希知遇於當世故已之德人者
甚鮮人之德已者甚多嘗訓諸子曰處善循理人生至
樂仕宦何為當道以教官薦辭不受又嘗自贊其畫像
有曰務本之學施於孫子士稱其言先行而後從晚歲
家居優裕肆力於學適意於文廣坐辯論經旨專門士

或病之天厯己巳夏五月疾作醫至却藥不飲疾甚諸
子請所以命輒厲聲曰若輩皆四五十之年猶待刺刺
語耶有間曰張公藝九世同居惟一忍字汝曹識之端
坐正衣冠而瞑是月二十日也得年七十有六至元丁
丑十二月壬辰葬臨江新喻鍾山鄉龍伏之原曾大父
峻大父珣父夢顯積德起家初娶鐫氏繼室許氏皆先
卒子男四震亨晉亨巽亨克世家學鼎亨仕八蕃有招
蠻功宣撫司辟薦以官聞母喪歸不就巽亨仕湖南辟

清湘縣儒學教諭以親老辭女四適李適彭適胡適劉
皆里名家孫男四長天祐次天福蚤卒次天與天啓孫
女七曾孫男三曾孫女四吾歐陽氏以有妣支裔封越
後并於楚受封於烏程之歐陽亭侯子孫以亭侯為氏
歷兩漢涉魏晉六朝唐宋迄今南北歐陽惟一族非如
他姓各有所從始者然自涿州太守而下顯者曰冀州
渤海青州千乘千乘中絕今皆渤海後又自率更令而
下顯者曰長沙自吉州刺史而下顯者曰廬陵其實出

於一詳見唐書宰相世系表及我兗國文忠公譜說居士先世繇廬陵之安福義厯遷今防里上世有府君諱係在諸昆弟中子孫多遷居外郡有復遷安福之早禾田有遷潭州之瀏陽馬渡者若是者不一居士亦係後於防里其處者也玄之於瀏陽遷者也由始遷至先叅政冀國公纔三世故世次可考居士於冀國公族弟也玄於居士族子也巽亨來京師求表居士墓義不敢辭為之銘曰才周世用世用則訥德應人求求人則怯我

宗儀刑遺不我愍我表其截三世其親

讀圭齋先生所撰南谷居士墓碑知昔人之所積者
忠厚深長其遺諸子若孫固異乎衆人也自凋謝之
餘而資源昆弟皆卓然復昌其先世又知天之報施
善人果不爽也嗚呼世之人何苦而不積善哉

洪武二十四年六月二十有二日翰林黃子澄書

永新龍母吳氏墓銘

晝而出必掩面幽其明銘何炫宵而行必秉燭明其幽

銘何瀆生存正沒順寧酌二義可也銘婦之冢嫂之丘
繫吳氏羅其憂事莫難彛倫間公無怨私無瘵姑宜家
叔宜室卑者勞尊者逸城有屋郊有居相夫子手拮据
子於親無二上禮有別孝無讓父之命子之誅人信之
惟天理惠于宗德于鄉宜太史銘其藏

余拙於書病餘愈拙近日求予文者多強予書余不
得已力書以塞其請然實非余之素志也禾川龍孝
子謁其母吳氏墓銘獨能見諒於是請太常博士劉

聞大書余甚嘉之因書銘後使知得余書者不如諒
余書者之使余感也致其詞來請者其西賓戴與權
也其人左賢使余不忘歐陽玄書

元處士劉公梅國先生墓銘有序

公姓鐫氏諱隆瑞字立賢世為安成望族幼穎悟力學
家居孝友遭父母喪勉力襄事動循禮則宗黨繩之遇
諸子姓獎借誘掖期于成人人才性所弛輒加警約劉氏
塾業彬彬可觀公教居多世變桑海舊家子弟巽懷奴

客乘勢恣睢公奮以法鋤拉強梗至元甲午獠寇陸梁
青山朝廷遣簽樞督捕輒欲禽狝其鄉聞者竄匿公遠
迎大軍供億畢給民用無恐豪右有宿憾于鄉伺間報
復公辨出無辜活者千計寇平師旋居民殘燬札瘥荐
臻公被府檄勞來遺氓賑飢療疾流亡四集有司築堡
壘以戒不虞公曰軍名備禦實則病民卒言大閭遂撤
其戍民迄今便之公機警倜儻踈財樂施為人燭難觸
糾德色不見幾微晚歲延名師淑諸孫暇日觴詠暢適

泊然無求於時所居多梅因號梅國先生至治壬戌四月十五日卒明年十二月十六日葬鄉之南山壽五十有八按狀劉氏在南唐時有為袁州刺史者始遷安成蜜湖傳至克都府君再遷南溪五世為評事府君良輔二子長廸功郎龍南尉汶次脩職郎沅陵令崧沅陵子鑑醴陵令孔彰善誠齋楊文節公萬里醴陵子墳墳子鑑以文學顯終承事郎秘書省校書郎秘書生天福脩職郎廣西帥司幕官是為公之考號恕齋澗谷羅公倚婿

之嘗及接見後村劉公克莊為人慷慨多智畧與文丞
相有婣好雅見器異須溪鍾公辰翁青山趙公文靜德
王公夢應復心崔公君舉異吾彭某皆嘗與之遊君子
於公行義之卓尚論先世蘊蓄之深先友過從之盛而
知其負挾有自來矣伯兄震漕貢進士仲兄薦補國學
生咸有士譽公娶王氏女有婦德能持家後公一年卒
子燧字持敬孫曰漢善鵬嵩岳正泰鈞貫凡九人述行
狀者湖南宣尉副使周君志仁介燧請銘者太常博士

劉君聞也玄識燧久銘何可辭銘曰安成在漢隸邑長
沙十世有美蜜湖是家處士侃侃濬厥義問秩若紀綱
不煩以素範族以正剴物以剛抑浮惇雅植弱耕強鼃
嘯于鼓王師薄違鴻飛于渚公曰曷歸素箠軍門其勇
萬夫勲其有餘翼蔽一隅孰弱爾巢我堅爾屋孰莠爾田
我庠爾粟民將德公尸祝百世公曰噫嘻我求無愧衆
芳所都紛郁粹醲涵泳堯仁優游以終彼秩三品奉常
斯謚法當立傳太史乃議奉常言之銘者太史儕是寵

光展也君子松柏鬱鬱君子之域宜爾子孫維德之植
元翰林侍講學士中奉大夫知制誥同脩國史
同知經筵事豫章揭公墓誌銘

至正四年七月壬辰翰林侍講學士揭公曼碩以總裁
宿史館得寒疾歸寓舍戊戌薨時京師大雨彌月朝縉
大夫聞者不避泥潦馳往哭之人人盡哀明日中書出
公用鈔二千五百緡率先為賻於是樞密院御史臺六
部以下咸致賻儀有差車駕在上京適遣使賜諸摠裁

及史官燕勞以公故咸援禮辭中書為改燕之日使者
歸上京白宰相宰相以聞有旨賜中統萬緡給喪事有
司議以驛舟送其櫬歸江南孤泫奉史官劉聞所狀行
詣立謁公墓銘立與公三為同寅相知為深公死為之
哀痛踰月不能忘故不銘有所不忍銘有所不忍九月
泫將扶護登舟廼勉叙而銘曼碩諱侯斯姓揭氏生而
穎悟年十二三讀書屬文即知古人蹊徑家貧不能具
束脩從學惟蚤暮刻苦父子兄弟自為師友稍長豁然

貫通日有增益未弱冠里大家延之授業諸生年或相等皆以師道嚴憚之二十餘負雋譽游江漢間司徒程楚公為湖北憲使奇其才妻以從妹皇慶初程公入朝公館其門時國初諸老尚存聞程公有佳客咸願識之及與之言薦恐後延祐元年用薦為翰林國史院編脩官三年陞應奉翰林文字同知制誥四年遷國子助教學士承旨復奏留之五年謁告歸泰定元年復授應奉翰林文字丁內艱去職天歷二年秋文宗開奎章閣置

授經郎教勲舊大臣子孫於宮中公首被選至順元年
預脩經世大典三年書成超授藝文監丞叅檢校書籍
事元統遷翰林待制後至元四年擢集賢直學士五年
奉旨代祀北嶽北海濟瀆南鎮竣事引疾便道由浙左
歸豫章六年以奎章供奉學士召未至改授翰林直學
士知制誥同脩國史至正改元兼經筵官二年陞翰林
侍講學士且命同知經筵事三年年及七十請致仕歸
上聞亟遣使追及潯南拜表力辭再遣使奉上尊諭旨

還撰明宗皇帝神御殿碑文成求去不聽夏四月詔脩
遼金宋三史命右丞相為都總裁中書平章政事特穆
爾達實以下凡六人為總裁官公預其選遂不得辭明年
遼史既進金史垂成公薨壽七十有一揭姓相傳出楚
司馬氏世遠姓稀譜逸或云出漢功臣陽信侯或云出
安道侯漢以後揭氏居高平居汝居郢唐乾寧中有諱
鎮者以左僕射持節袁州刺史揭氏仕東南者昉見於
此今江右諸揭居豫章居盱廣昌皆大族豫章族始祖

積盱廣昌始祖填推其訓名蓋積填伯仲曼碩居豫章
豐城今為富州曾祖光朝妣黃氏祖性聰累贈嘉議大
夫禮部尚書上輕車都尉追封豫章郡侯妣黃氏繼何
氏並追封豫章郡夫人父來成以邃學篤行見推前輩
先賜謚貞文先生贈中奉大夫江西等處行中書省叅
知政事護軍追封豫章郡公妣黃氏追封豫章郡夫人
皆以公貴推恩初娶李氏繼程氏荆湖北道宣尉同知
巖鄉之女先公卒並追封豫章郡夫人子男二長沄國

學上舍生克世父業李氏出也幼廣陽生始四歲女一人適秀才楊湘孫男一敬祖孫女一公職子弟未嘗有纖芥貽其親憂昆弟有無相通始終無間言少自處約立身洎有祿入服食稍踰於前輒愀然思其親曰吾親未嘗享此故平生清苦儉素老而不渝在京師三紀官至五品出入始乘馬為授經郎諸貴游子弟見其徒步每蚤作宮門辨色輒先諸侍臣至謀為之貫馬公聞之自置一騎尋復鬻之示非所欲初遊湖南見前宣尉文

惠公趙淇趙素號知人謂公曰君他日翰苑名流憲使
涿郡盧公摯見輒稱許其歸朝竟以翰屬薦之薦牘今
在掌故至京師受知太保李文忠公孟樞密王文定公
約承旨趙文敏公孟頫學士元文敏公明善先是東南
士聚輦下如四明公楠巴西公文原雍郡公集有盛名
公卿間既而貢集賢奎章周待制應極薦之皆馳騁清
途公與清江范梈德機浦城楊載仲宏繼至翰墨往復
更為倡酬公文章在諸賢中正大簡潔體制嚴整作詩

長於古樂府選體律詩長句偉然有盛唐風楷法精健
閒雅行書尤工國家典冊及功臣家傳賜碑遇其當筆
往往傳誦於人四方釋老氏碑版購其文若字表及殊
域門人集其所著已板行於世在國史時李文忠公見
所脩功臣列傳撫卷歎曰他人謄史牘耳若此方謂之
傳在奎章時上覽所撰秋官憲典驚曰茲非唐律乎又
覽所進太平政要四十九章喜而呼其字以示臺臣曰
此朕授經郎揭曼碩所進卿等試觀之其本常置御榻

側為經筵官今上聽其講篇深嘉其忠懇故其際遇累朝皆非踈遠儒臣所敢望者延祐末朝廷倏罷群臣贈典公之父獨得賜號貞文又賜之碑天厯至順中大臣有薦文士人主必問之曰其才比揭曼碩如何累稱其才可用欲罷使以政今上初即位一日使衛士召公至則以內府所賜諸王段表裏賜之將賜躬自辨識然後以授講經退又賜金織紋段至正改選格諸超陞不越二等公由中順大夫進中奉大夫獨不為例超授四等

轉八階進神御殿碑特賜楮幣中統萬緡白金五十兩
中宮亦賜白金如其數又為之賜貞文書院額仍許置
學官若此異數公受之踧踖不見幾微自銜之色而許
國之志益自奮厲故處散地論政薦士以古人自期王
文定公嘗言與揭公談治道大起人意對大臣言其辭
不及他第言某處災傷未賑卹某政弊未除某人賢在
下位未擢用自潞南召還丞相與候見便殿因問方今
治政何先公曰養人養人何先公曰人才當譽望未隆

之時養之在朝廷使周知庶務一旦用之自識治體及置史局又問脩史之道何先曰收書用人又問用人何先曰用人先論心術心術者脩史之本也心術不正其他雖長不可用公求去之意未釋上使丞相及諸執政面諭留公公曰使揭某有一得之獻而諸公能用其言天下遂獲其利雖老死於此不恨不然何益之有他日集議東內公倡言鈔法大弊合用新舊銅錢權以救之政府不樂論議辨駁示以顏色公辨不少變丞相心深

敬之故人才因公言知名善政因公言張本公出不以告人人亦鮮知之惟豐城地不產金而金課益倍為害歷年公上言罷之集賢考校諸路學官所業下胄監移博士吏文淹滯儒者公請改其制以其事付本屬官竟得奏允御史言下第舉人以充學正山長鄉舉放次榜以充教諭學錄廟堂以咨公公力贊成之此世所知者考鄉試會試一廷試為讀卷官二國子監公試七多得名士後居要路所教勲舊子孫後多為重臣公待之泊

然不矜詡以爲聲援於程公禮若賓客人弗知其爲肺
腑親性耿介易直好善惡惡表裡如一聞郡縣有一廉
吏他日臨文必旁引曲論以極其稱道或恐其過聽失
實公則曰如是猶不足以勸善況敢億不信乎至聞吏
有貪墨病民論之曾不少恕嘗有郡侯以勢諷其部民
奉金爲公壽求文記其德政公頗知其人斥之曰汝郡
侯所行如何吾敢有以飾辭爲諛乎其人未幾以賂敗
朝中名臣意趣或不與之合終身不一造其門雖嘗以

是為軋公曰吾之進退用舍一聽諸天人何能為世路
齟齬時或不平心有所感形諸詩文旁觀謂其太甚公
曰言當如是不必慮也其遇善類及新進諸生乃復恂
恂汲引某年求文者多寢食為廢子弟數以為言公殊
無厭苦意有客為人求文而私其金公既予文他客發
其事公曰已受之矣終無所言聞者稱其長厚臧獲有
過徐以理責之人問之曰長上遇下稍見卞急後生便
習暴戾當以身教稟性堅壯動作簡便羣下易事公集

必蚤官事尤勤進遼史後有旨獎論史官早成金宋二
史公奉命黽勉朝夕匪懈先代故事臧否奮筆書之身
任勞責不以委人屢言今人徒知求作史法不知求作
史意古人善言雖微必詳惡事雖隱必書其意主於勸
戒耳當暑濕盛作移居館中頗自恃其精力踈於攝生
遂致疾不起昔玄與公共脩憲典公素習律儀又勤於
考訂書大半成於公今又共史事公之勤不減昔時乃
遽失援公未病前數日謂玄曰某平生愛公文恨無因

獲一言早晚史事成求公作貞文書院記記成而刻
吾志畢矣玄敬諾之悲夫斯言詎意未記書院而先
銘公之墓乎法卜葬某鄉某原期以某年月日預為
之銘銘曰古稱良史造物忌子敘是非擅萬世嗟公
直筆庶不劇獎善懲惡義之比惡書不貸善書亟寒
暑晝夜勦形思公起南服抱腹笥布衣徒步品第二
尚方召見呼以字致君惓惓効獻替講經作史出一
意陳規進戒為已事惜哉負挾勤少試徒抒精忠載

言議感慨論列時出涕唐之甫也漢之誼以文發身
卒以斃豐城故墟干將瘞夜占斗牛有文氣將徵遺
篇錄後裔

元故將仕郎臨安路錄事羅君墓誌銘

延祐二年仁廟初以科目取天下士左右榜得五十六
人時朝廷驟黜舊制一以經學行義取人所得士非故
業舉子以應時需者十五六年間司風紀掌綸綍內綜
機務外使絕域才不乏使其間居位勇退能以風義先

天下則惟羅君求師一人求師諱曾家廬陵新安里登第授將仕郎寧都州判官再調臨江錄事以初授官終焉其退非有扞格不偶亦非以材具不適時而所慕有大於此者惕乎若不能以斯須留故同年之士聞君之風反自脩省失所負挾怡然欲爭君之高而莫之能也君至寧都蔡寇甫平凋瘵未復奮以身任撫摩芟其強梁難去宿蠹久乃按堵臨江素號繁劇吏初疑儒者劣於刺裁君夙夜勤恪事無留難暮年綱紀脩舉一日聞

親有疾遂棄官去自是不復出仕以死惜哉羅氏吉望族曾祖士友宋承務郎致仕士友母年滿百故相文山文公與其子弟有斯文昆弟之好奉幣載酒升堂拜母題詩廳壁鄉里榮之曾祖妣蕭氏恩封孺人祖塋父寅君孝出至性親病自臨江歸拜醫嘗藥衣不解帶親終毀瘠異常禪除餘年哀不忘嘗廬母鐫氏墓蔬食數歲不變事繼母習氏尤孝其死習慟之切至其平居終日忻忻喜愠不色蒞政廉約遇物謙冲自束髮與人交不

見幾微褊心登第偕同年蕭君立夫舟還蕭僕死給以
已從蕭病臨清一月君一月留甘苦燥濕共之未幾蕭
即世教其孤遺長妻以女其所為不愧古人類如是泰
定四年丁卯十有二月二十二日以疾卒於家享年四
十有五以次年某月某日葬于廬陵之清湖娶文氏子
男一人會之克世其學造物之報庶幾在茲女四人長
適蕭霽餘幼霽即立夫子今江西鄉貢進士狀其行來
求銘嗚呼余於君為同年又同生昭陽協洽之歲霽來

始聞君之訃乃哭諸寢門之外為之銘曰雅之烏烏不止於藪而集于枯車之輶輶不馳于坦而陟于阪嗚呼羅君士之以為難兮君固即所安兮而卒老於一官兮

曾秀才墓誌名

秀才曾氏子一漢既沒于江南其兄德元在京師聞而哭之慟知其塋有時奉行狀乞銘於歐陽玄拜且泣曰人之生苟有德慧孰不願有辭於永世也弟一漢實曾氏才子弟今不幸短命父兄不能續以長願得先進一

言以傳庶幾猶未死也玄聞其言惻然乃叙而銘之曾氏永豐顯親里大家一漢字明善本曾似翁第三子大父悼其兄之似俞早夭無後以繼之大德十年丙午五月庚午朏生天歷二年庚午五月癸丑朏死是月戊午改至順以是年某月某日葬于某里之原一漢五歲讀書數千百言過目成誦少長無童心年十二三能文章十五六頎然長以弁不尚浮靡不事貨殖篤志道德性命之書能服行其言事父兄善交朋友信遇宗族之長

老恭未及壯有學行詞章凜凜超老成人初師里士劉福遠習舉子業精熟尋執贄臨川吳先生門受諸經說大稱穎悟年二十有五病痰喘以死方疾未甚四月十日有厲風從西北來拔並舍大木似翁著得未濟之巽心疑之不踰月一漢乃不起妻鍾氏子男一人萬奴裁四月而孤行述似翁所自作其文不勝哀有甚於德元言者嗚呼為父兄鮮有不愛其子弟者論才不才恩義有不相掩者一漢死父兄若失希世重寶不能自存嗚

呼一漢真佳子弟矣乎銘曰麟之不角麝不如殞鷗之不翰鷃不如鵝奪其所有無予之為瘡隳其垂成無生之為寧坎而深樹而慘無重傷其父兄之心

歐陽奇翁先生墓誌銘

先生諱文壽號奇翁姓歐陽氏立之族兄也其先由廬陵徙安福之義歷復由義歷徙分宜之防里曾祖子敬祖西園皆篤厚好施與鄉稱長者考登仕郎化龍慷慨以功名自許妣李氏有淑德公生以辛未五月初四日

卒以祭未六月十八日享年七十有三賢配彭氏出里名族子所性才幹克家孫吾貫篤問學善吟咏頃予在朝公遣姪勞予京師及謁告南歸又勞予于家囑叙其譜詎意譜序成而公沒玄聞訃哭諸寢門之外不能堪未幾所性懼公湮沒無傳屢以墓文為請將以圖於不朽予雖欲遲之恐歲月逾邁無以盡情則于墓文又烏可已耶公自幼穎悟甫數歲讀書過目輒成誦年十餘扶書出就外傳勤謹不懈鄰人有厭其夜讀者公焚膏

繼晷諷誦不輟自若也父沒不勝哀慟廬墓三年而後
歸仁宗族義鄉黨內外稱之無間言常恐子弟廢其世
業延名師儒訓切之日復親督其課夜分乃止如是者
以為常中年文學大進不求利達師表鄉閭晚節深居
罕與人接見惟幅巾藜杖逍遙林壑間從一二賓客自
娛其高尚縣可見矣以其年卜葬安福縣六十七都地
名黃竹坑坤申山寅艮向之原立於公為族弟故不辭
而為之銘銘曰裕已範世兮學行允敦內蘊弗施兮既

臧且淳子克其家兮孫踵其仁勒此貞石兮其永有聞

圭齋文集卷十

欽定四庫全書

圭齋文集卷十一

元 歐陽玄 撰

阡表 哀辭

安成劉氏儒行阡表

至正甲申安成劉君粹衷以翰林應奉為後宋局脩史
官未病前一月述其先世梗槩凡葬于里之儒行鄉者
幾所總名之曰儒行阡謁余表之余諾其請矣粹衷未
幾病作又未幾疾甚遣其子都來趣余為阡表余有所

不忍也已而果卒哭之盡哀而告之曰古人有挂劍之義儒行泮之表余諾君請矣余忍有愧於古人乎越二年丙戌春余將南歸乃表之曰安成在漢屬長沙國定王發子孫衆多今安成鐫氏獨多於他所蓋其後然安成之鐫亦有兩支焉其一曰南陽太守遐之裔遐魏元陽堦也考遐之先亦漢宗室粹秉性質直叙其先世起自五世直卿府君迄於父龍泉府君行實有可考者書之其不可考者則亦闕之而已矣直卿府君諱諤娶彭

氏沒合葬小唐之原子雄材字子厚生淳熙壬寅歿景
定壬戌祔於先塋之東南娶李氏葬雙牌嶺繼王氏祔
子厚墓右生三子長炳字季文歿于至元乙酉祔祖塋
之左次煥燧皆無後季文生三子長應龍娶趙氏歿同
祔李孺人墓側次祐孫娶鍾氏合葬由慈灣次承翁字
德甫王氏出也累監吉水泰和吳城南康等稅生於宋
淳祐壬子六月歿於大德壬寅四月祔祐孫之塋娶穰
氏生景定庚申之十一月歿大厯之九月祔王孺人墓

右子輝字明卿生至元辛巳沒至治壬戌以子貴贈承事郎龍泉縣尹葵里之稼木塘娶陽氏封宜人子性即粹衷孫一人曰都此其自叙若此五世皆業儒其鄉又以儒行著名旣曰儒行誰曰不宜大夫士惜之者曰劉氏數世力學至粹衷始有祿爵于朝以粹衷之才使得中壽其所就豈可量哉余則曰天下之事惟不足故有餘日行一日不及天者一度月行一日不及天者十三度有奇是不足也積其不足乃有餘分及有置閏則氣

朔分齊而成功矣天且如是而況於人乎人謂之不足
則錡氏之有餘慶者庶乎在此粹衷有學識能詞章會
試御試皆第二在南士中實第一名為旌德縣尹廉明
有威政化大行遷應奉翰林文字儒林郎同知制誥兼
脩國史院編修官其與修宋史大愜士論余庚午科考
試南宮實余所得士有斯文之契故為之表云

蕭同善哀辭

人貴有後兮子貴為男男固可尚兮子職曷堪生而懸

孤兮西東北南終老邾下兮壯志斯慚違親從祿兮孰
爲旨甘榮與養俱兮此樂孔耽求備造物兮十無二三
一或缺望兮終身之嘆隱君有子兮詩禮是揮更習律
令兮讀例與凡郊以儒薦兮辰抱憤慘泝瞻隱君兮宰
木既斬幸哉有母兮華髮滿鬢兒服楚楚兮懷母擔擔
燕礪十霜兮吳桑幾蠶縮戌望更兮匪進之貪生可爲
養兮逝恩其覃歲月不貸兮枯魚之銜吁嗟隱君兮聲
流泐泐孝則愚史兮壽非彭聃遭世任僚兮脫身戈鉞

負母遁逃兮賊鋒以戒荒流血漸腓兮惟膂之咸創臣
雖遠兮永卹之函掾語反是兮煩憂如惓泰山有雲兮
起乎崑崙膚寸裁合兮八翼可曇維此下沕兮氣升江
潭將族而雨兮風醺其醺思溉根本兮澤蔕及涵感彼
何易兮順如馳颿此進獨難兮右跣履嶢所處實異兮
命疇吊讒擔志不渝兮明神允監稅為哀詞兮視此幽
薊

圭齋文集卷十一

欽定四庫全書

圭齋文集卷十二

元 歐陽玄 撰

經疑

問夫子以小器稱管仲而又以如其仁許之何也
對聖人之用人有以德之體言者有以德之用言者不
可以一槩觀也夫以德之全體而言則天之所以賦於
人人之所以得於天者其體其大也惟聖人為能踐形
下聖人幾等而以德之全體論之烏得不少為之貶哉

故喻之以器器者如物之所受淺深限量自有不可得而誣者也若夫有以德之用言者則不然夫德非徒貴乎足已以其有及物之功也而王霸之會世變之來有人於此乃能明大義以安斯民聖人即是論之安得不深許之哉故稱之曰仁仁者之用莫大於愛物也迹其惠之在民心功之在天下亦安得而泯之哉昔夫子之論管仲或曰小器或曰如其仁其體用之殊乎夫仁之一字夫子未嘗輕以許人是以顏冉之流工夫造詣之

高下夫子於言仁之際若有分寸較於其間獨於管仲則曰如其仁如其仁既許而又不一許之豈有他哉蓋自姬轍既東楚氛浸盛生民之擾擾紛紛者未有紀極也仲也出而相桓公合諸侯匡天下不以兵車之力焉其仁之及物為何如邪求之當時未見仲比也至於其器之易盈不能使已無三歸之僭公無多嬖之失齊政旋踵而衰則器之所受不過如是而止使其擴而克之以至於一初之全體則可以拓聖賢之業載宇宙之重

惜乎非仲所能及也蓋必至是然後為大器之體段焉
仲之為小不亦宜乎然則聖人之論何往而非公乎

問孟子以隘與不恭稱夷惠而又以聖人百世
之師推之何也

對人有絕世之行可以為聖矣而未至於化也故不能
無一偏之弊焉夫聖而至於化則世無得而名有聖人
之一事而至其極焉始有絕世之名矣由其有絕世之
名是以清者一於清而未必和和者一於和而未必清

於是不廣之意擴不恭之氣象生焉雖不害其為聖人
也而君子至公之論豈得以此廢彼哉孟子之稱夷惠
或曰隘與不恭或以聖人百世之師推之非異論也自
今觀之讓國而逃諫伐而餓與夫不羞污君不卑小官
聞其風者頑廉而懦立薄敷而鄙寬則百世一夷惠而
已誠聖人也然而朝冠塗炭之偏袒裼我側之污不幾
疾惡之已甚同流之無別乎大抵清不期於隘和不期
於不恭特其不能化而馴致其弊焉彼夷惠亦不自知

其然也由是觀之負絕世之名者夷惠之得為聖人以
此也其不得為大而化之之聖人亦以此也若吾孔子
則不然絕孺悲拒陽貨見小君於衛國應佛肸於中牟
時乎清時乎和無適而不可也夷惠能之乎故不觀孔
子無以見夷惠雖然亦豈可以是以遽少夷惠哉孟子曰
伯夷聖之清柳下惠聖之和孔子聖之時然則二子亦
孔子之徒歟

書義

翕受敷施九德咸事俊乂在官百僚師師百工

惟時

自古者以成德觀人而人才治效之盛為不可及也夫
成德者君子自然之德然君子有是德而不能以是德
自見於事功惟古之聖人有以知之而每以為觀人之
法焉凡有司百執事之臣莫不由是而取材故嘉謨之
入告庶績之咸熙無往而非是德之形著也人才治效
之盛無越於帝舜之朝此其故歟書曰云所謂九德

者非臯陶所謂人之有九德歟訓書者以為成德之自然非以彼濟此之謂也自帝世以知人為難而臯陶陳九德之目或養直而溫和或簡易而廉隅或果毅以為擾或塞實以為強其他或六或三不一槩也有六德而嚴祇者則錫之以有邦有三德而宣明者則任之以有家觀人之法拳拳於九德焉生斯世者不患其無位也而患其不能有是德於是莫不精白以承休勤敏以趨事者以聖人能翕合而受之敷布而施之也人見其俊

又在官也而不知九德之時措也故夫九官相遜茲非
百僚師師之興起乎十有二牧惟時亮天工茲非百工
惟時之則倣乎所以相遜所以亮天工者非九德之君
子孰能與於斯由是觀之九德咸事之一語其虞朝觀
人之法得人之本歟後世惟殷周之宅俊灼俊意為近
之故其人才之盛亦髣髴有虞之世秦漢而降急於功
利權謀之近效而用區區勝德之小才於是九德之目
僅存於書耳或曰虞廷君子之多而舜猶以知人為難

者蓋慮靜言庸違之在朝讒說殄行之震驚朕師者未
盡杜絕聖人觀人之法不可一日廢也然吾觀百僚師
師百工惟時之後則君子多而不仁遠矣故又曰何畏
乎巧言令色孔壬

策

問今天下之事有可言者多矣姑舉其大者言
之冗官之未汰銓選之未精殿最之未明法律
之未定此四者方今之急務朝廷之所欲聞而

士君子所當講者其參酌古今以對毋泛毋略
對洪惟盛時設茂科策多士而開其直述之門執事典
文衡詢承學而試以時務之大夫天下之事誠多矣至
於大而可言者亦今世之所囁嚅者也自士大夫間以
道故常為練事以言要切為干時是以至論罕聞今執
事不循故常不貴泛畧舉急務以詢諸人豈非盛時開
直述之門而得為不諱之問然而所謂直述者非以其
文朴野而以其言之切直也既以不諱問宜以直述對

昔夫子以林放為大哉問非大其問以其知本也事不知本多言何裨愚請言事之本矣明問有曰云是四者方今所欲聞也愚謂非特方今之所欲聞乃方今之已行者也其間行之弗竟守之弗一或者未究其本乎如冗官之汰大德之初嘗舉行之中書以打減置局而董之以平章某公或議某司當併某司則創某司以兼領之議者或創而罷者尋復矣辛亥更化渙發德音減遙授之官改陞創設者日議併罷乃併通政於兵部武

備等院皆復舊制京畿寺監罷者非一是則冗官汰矣
然而輿圖之廣郡邑之衆旁蹊曲徑之捷出者未悉汰
也銓選之精則自混一以來立省選部選之法為二別
子弟承襲承繼承蔭之例為三設吏員譯學儒業軍功
出身之科為四是則銓選精矣然而氏族貴賤之未別
歲月賢否之同淹或未暇精也殿最之明則自大德皇
慶以來定十三條之章法或遣宣撫巡觀或命御史徧
歷是則非不明也然而各處廉能五人之薦未見即用

也三考黜陟之法未見可久也法律之定則非無至元
新格也非無省部之編例也然而掾史一時之議擬而
通行者盡合於至元之法意乎廣平何相之撰擬而未
進者竟能為大德之成書乎由是觀之四者非不知也
非不行也愚請論其本焉其一曰汰冗官之本在於減
閒散之俸以厚正官塞僥倖之路以清正選今正官之
俸甚薄而散秩之祿尚多昔劉景升有大牛芻豆數倍
而負任不及常畜曹操以之享士戒冗食也況方以歷

俸為出身減祿俸之無名則出身有限矣若僥倖之門
斯又正選之大患也古者判行使之置損外同之設未
必非有所循而為是名以處之而漢之爛胃晉之續貂
實濫觴於茲誠能如漢文欲用嗇夫而張釋之終以為
不可家人濫求郎官而明帝終不以為私恩則冗者可
汰矣其二曰精銓選之本在於嚴族屬之分以尊吾國
人畧歲月之考以拔其才用今之女真河西明有著令
而自混色目北庭族屬鄰於近似而均視蒙古乘堅駟

良亟列通顯蓋我國人天性渾厚不自標榜愚恐數百年之後求麟趾之公姓不可復別異矣欲還淳古之風去傑黠之習則必如貞觀之於崔盧氏族命近臣編之使其派系分明不得揉進可也至於歲月之考能否同滯此可蓄常調不可以待賢才誠能覈名實以甄異能使碌碌庸吏不得含糊湊湊苟資歷求序遷則當如崔祐甫除官八百而不拘常資寇萊公却例用新進而號得士則銓選可精矣其三曰明殿最之本在於擇才明

之監司絕殿序之汚吏夫貨來之徒玩法而殘民者也
豈可復為民之父母乎三年之殿邊遠之任未是悛也
孟子曰不祥之實蔽賢者當之身為方岳而見善不舉
豈得復為人之耳目乎絕汙吏則願如唐太宗之於黨
仁宏苟犯賄賂雖至親幸難以滅公責監司則願如齊
宣王之封即墨而烹阿大夫晉文公之誅曹而數其不
用僇負羈則監司必舉汚吏必除最者非假請托殿者
不可僥倖矣其四曰定法律之本在于酌古今以成法

書優祿秩以選法吏今法書無一定法吏無優選推謙
混於常流條令裒於書肆官不徧覩法無定科輕重高
下逢其喜怒出入比附係其愛憎無成書則近於罔民
無優秩則昧於勸善昔者子產鑄刑書雖曰叔向笑之
而鄭以治以能止辟也于定國為廷尉以民無冤而至
三公近代錢若水以同州推官清直而擢樞副前以示
勸也如是則法書必作法吏必優刑自平允律自精熟
矣四者之本愚既已畧言之其目之備更僕未可終也

雖然四者之本所以行之者一也一者何也信而已方
今天下急務所可言者孰有大於信之一字乎書曰令
出惟行商鞅之伯術亦以示信為先令而不信則冗官
何由汰銓選何由精殿最何由明法律何由定乎愚故
曰所以行之者信而已明問有曰宜叅酌古今以對母
泛母畧嗟夫執事以急務為問愚敢以泛畧為對乎然
四者之有信猶水木之有本源也故敢以為終篇獻執
事其思之

制曰朕聞聖賢之君之治天下也或恭已無為或不遑暇食或寬仁恭儉或力於為善其所以致治雖殊及乎民安物阜風淳俗美刑辟措而鮮用頌聲作於田里制禮作樂翕然太和而麟鳳龜龍嘉禾朱草甘露醴泉諸福之物莫不畢至雖帝王之美不徒在是亦其氣之應也舜文之德化尚矣若漢之文帝唐之太宗猶能致治如彼况薄漢唐而不居者乎今天下雖久寧謐

戶口雖甚蕃滋而稼穡或傷於水旱細民或致
於阻飢未能家給人足時猶仰濟縣官豈行仁
義有未盡效耶予大夫明古以識今知常而通
變毋迂闊於事情毋乖戾於典則明以對朕朕
將親覽焉

臣對臣聞有志者事竟成人主之致治莫先於立志故
善觀人主之治者先觀其志夫人主以能致之資操可
致之勢所圖無不獲所欲無不成以求乎天而天應之

以求乎人而人從之所以然者以其志之先定也其或
致理之效偶有未備天人之間偶有未和則當守之以
專達之以彊以俟夫悠久之效不可以疑貳阻之也臣
草茅賤士何敢上揆淵衷然以臣切觀陛下之所為真
近古以來大有為之君也陛下曩在東宮仁孝之資英
毅之畧聞於天下也久矣既而徵四方書以考古今飛
龍之初大召宿儒詢問要道臨御之後不邇聲色不事
遊畋凡耳目之娛營繕之事秋毫不經於心惟經籍史

傳日接于前於是大興儒科黼黻至治祖宗以來百餘
年之曠典一旦舉而行之遂使臣之淺陋亦獲叨奉大
對於明時雖然臣之望陛下者以陛下為有大志而陛
下之策臣者亦適有以發臣之愚臣伏讀聖策曰朕聞
聖賢之君之治天下也或恭已無為或不遑暇食或寬
仁恭儉或力於為善其所以致治雖殊及乎民安物阜
風俗淳美刑辟措而鮮用頌聲作於田里制禮作樂翕
然大和而麟鳳龜龍嘉禾朱草甘露醴泉諸福之物莫

不畢至雖帝王之美不徒在是亦其氣之應也舜文之德化尚矣若漢之文帝唐之太宗猶能致治如彼況薄漢唐而不居者乎嗟夫薄漢唐一語此乃聖志之發見也陛下此志可與四三王可與六五帝矣其曰或恭已無為或不遑暇食或寬仁恭儉或力於為善臣愚以謂此未可以觀致治之殊當有以驗立志之同也古人有言曰始於憂勤終於逸樂若以恭已無為異乎不遑暇食則隆古之恭已無為者莫舜若也然而一日二日萬

幾舜何不少自逸豫乎若以恭儉寬仁異乎力於為善則近代之恭儉寬仁者莫漢文若也然而拊髀思賢夜半前席漢文何不為是元默乎由是觀之未有不憂勤始者自憂勤始志之同也陛下既薄漢唐臣不復庸引漢唐之事請以舜文終焉舜文之道布在典策陛下既慕舜文亦法其所為而已矣如欲民安而物阜風淳而俗美則當思夫利用厚生之何急也博典敷教之何先也由庚魚麗何自而多也闕雎麟趾何從而厚也陛

下能法舜文即舜文矣如欲刑辟措而鮮用頌聲作於
田里則當求如臯陶者命之明刑有如虞芮者俾之息
訟九歌可使勿壞也大雅可使無廢也陛下能法舜文
即舜文矣如欲制禮作樂翕然太和則當求如伯夷后
夔周公者命之制作於其間六典之制或尚可講也九
韶之音或尚可學也陛下能法舜文亦舜文矣至如麟
鳳龜龍諸福之物莫不畢至聖策有曰亦其氣之應也
臣愚以謂知氣則知志矣聖人志氣清明若神一動則

天地隨之諸福之物皆自聖人方寸中來非自外至也
中庸曰致中和天地位焉萬物育焉蓋吾之氣順則天
地萬物之氣亦順吾之氣和則天地萬物之氣亦和天
地之氣見於萬物同一和順則百獸自舞於舜之庭鳳
凰自鳴於文之岐矣又何祥瑞之足羨哉臣伏讀聖策
曰今天下雖久寧謐戶口雖甚蕃滋而稼穡或傷於水
旱細民或致於阻飢未能家給人足時猶仰濟縣官豈
行仁義猶未盡效耶臣愚以謂此天以堅陛下之志也


古人有言曰天心仁愛人君若曰稼穡或傷於水旱則
舜之所謂洚水驚予者猶有甚於今之傷稼者也若曰
黎民或致於阻飢則文王所謂小人怨汝詈汝者猶有
危於今日之阻飢者也顧二聖人之所以弭灾恤患者
罔游罔淫皇自敬德之外無聞焉陛下既法舜文詎知
天之所以啓舜文者不以啓今日耶陛下以敬天為志
則水旱可變為豐穰陛下以恤民為志則阻飢可變為
足食在方寸一轉移之間耳若諉之曰豈行仁義而未

盡效耶臣愚竊以為未然夫仁義之效如炊之必熟種
之必生行仁義而未至者有矣未有行仁義不效者也
陛下如以悠久待之或曰聖問如此而臣輒以為可以
四三王可以六五帝者何自而知之蓋因其已行者知
之也其未行者擴而充之斯無難蓋仁義之積禮樂必
興彼漢唐之治如身衣弋綈一臺惜費以致海內殷富
與夫斗米三錢外戶不閉自三代而下亦可謂盛矣然
賈生勸漢文以禮樂而辭曰未遑祖孝孫杜淹勸太宗

以禮樂而曰治之隆替不繫於此臣以是知二君於仁義之效若有所不知也今陛下銳情儒科日議禮樂而拳拳於仁義之二字視漢唐何啻相千萬耶此志所充宜其儼美於五三盛時也大槩國家之治當先論其根本不可責效於目前古之聖賢之君未嘗不憂勤於其始逸樂於其終災異於其先祥瑞於其後今日之不遑暇食力於為善他日之恭已無為恭儉寬仁也今日之水旱傷稼黎民阻飢他日之麟鳳龜龍嘉禾朱草也若

夫備禦之不可無術救荒之不可無政求芻之不可不擇一賢相事耳奚以多言為臣伏讀聖策曰子大夫明古以識今知常而通變毋迂闊於事情毋乖戾於典則明以對朕朕將親覽焉臣愚以謂事有古今志無古今事有通變志無通變聖人之志與天地之正氣相通志定於此氣應於彼有理之必然者倘論水旱而牽合於夏侯生輩洪範五事之說則鄰於迂闊矣論民飢用乏而附會於權萬紀等建利之謀則流於乖戾矣臣非不

知實所不敢臣之拳拳者惟曰有志者事竟成陛下留意焉國家幸甚天下幸甚臣謹對



圭齋文集卷十二